

明史紀事本末

明史紀事本末

明史紀事本末卷四

提督浙江學政僉事豐潤谷應泰編輯

太祖平吳

元順帝至正十三年夏五月泰州張士誠起兵陷高郵士誠白駒場亭民爲鹽場綱司牙僧與弟士德士信俱以販鹽緣爲奸利性輕財好施頗得衆心至是因亂與其黨李伯昇潘原明呂珍等十八人聚兵陷泰州

十四年冬十一月元右丞相脫脫圍高郵張士誠引兵逆戰脫脫奮擊大破之士誠不能支與呂珍潘原

明等十八騎突圍出走脫脫遂克高郵

十五年春三月元竄脫脫於雲南尋殺之

十六年春二月張士誠陷平江脫脫旣竄士誠亡命復聚眾渡海攻陷平江遂掠松江湖州常州諸郡皆下之九月徐達圍常州初常州奔牛壩人陳保二聚眾以黃帕裹首號黃包軍湯和等下鎮江保二降至是復叛歸張士誠誘執詹李二將去乙亥太祖遣楊憲通好於士誠書略曰近聞足下兵由通州遂有吳郡昔隗囂據天水以稱雄今足下據姑蘇以自王吾深爲足下喜吾與足下東西境也睦鄰守圉保境

息民古人所貴吾甚慕焉自今以後通使往來毋惑於交構之言以生邊釁士誠得書以太祖比之隗囂不悅拘留憲不還尋誘我斥堠以舟師攻鎮江徐達等禦之敗其軍於龍潭又寇宜興耿君用以鎧騰柵中槩死宜興入於士誠太祖聞之使諭徐達曰張士誠起於負販譎詐多端今來寇鎮江是其交已變當速出軍攻毘陵先機進取沮其詐謀於是達帥師攻常州進薄其壘士誠遣其弟張九六以數萬眾來援達曰張九六狡而善鬪使其勝鋒不可當吾當以計取之乃去城十八里設伏以待仍命總管趙均用率

鐵騎爲奇兵達親督師與九六戰鋒旣交均用鐵騎
橫衝其陣陣亂九六策馬走遇伏馬蹶爲先鋒刁國
寶王虎子所獲九六卽士德臬鷺有謀士誠陷諸郡
九六力爲多旣被擒士誠氣沮十月華雲龍王弼等
復敗士誠弟士信於舊館擒其驍將湯元帥士誠旣
連敗乃奉書請和願輸糧二十萬石黃金五百兩白
金三百斤以爲犒軍之資太祖復書數其開釁召兵
之罪且許其歸我使臣將校卽當班師士誠得書不
報十一月士誠誘我新附軍叛去助彼來戰徐達被
圍於牛塘達勒兵與戰常遇春廖永安胡大海自外

來援夾擊大破之擒其將張德餘兵奔入城達率諸軍困之士誠復遣其將呂珍潛入城督兵固守

十七年春二月丙午命耿炳文等率兵取長興張士誠將趙打虎以兵三千迎戰敗之追至城西門打虎走湖州戊申遂克長興擒其守將李福安答失蠻等獲戰船三百餘艘立永興翼元帥命耿炳文統兵守之尋士誠遣其僞左丞潘原明元帥嚴再興來寇炳文擊敗之生擒數百人斬首甚眾原明等遁去部將費聚復追至瑣橋敗之自是士誠不敢犯長興者四年時師圍常州既久敵眾乏食不能支呂珍等復

明史紀事本末卷四
潛遁去三月戊午克常州立長春樞密院以湯和爲
同僉總管統兵守之 夏五月俞通海張德勝等以
舟師略太湖入馬跡山衝賊水寨降張士誠將王貴
紐津經洞庭山口呂珍兵猝至諸將倉卒欲退通海
曰不可我寡乃身先士卒決戰矢中右目不爲動徐
令壯士披己胄立船上曰俞將軍珍不敢迫引去
命兩淮分院副使張鑑同僉何文正率兵攻秦興張
士誠遣兵來救鑑等擊敗之擒其將楊文德等己卯
遂克秦興 六月命常遇春分院判官趙繼祖元帥
郭天祿鎮撫吳良等率兵取江陰張士誠兵據秦望

山以拒王師繼祖等就攻之會大風雨其兵奔潰進
師據其山翼日己未進攻城西門克之擢良爲分院
判官督兵守禦江陰密邇士誠去姑蘇僅百餘里控
扼大江實當東南要衝未幾復命其弟吳禎增兵協
鎮良等戮力設備軍容甚張每寇至輒破走之 秋
七月丁丑徐達等下常熟八月徐達常遇春康茂才
襲江陰馬馱沙克之元帥費子賢下武康士誠累敗
勢日窘南攻嘉興杭州又爲楊完者所破乃請降於
元士誠雖降而城池甲兵錢穀皆自據如故
十八年春二月命廖永安俞通海桑世傑等討張士

誠江陰石牌海寇僞帥欒瑞帥州判朱錠等整兵拒戰世傑奮戈躍馬陷陣死永安等奮擊大敗之擒欒瑞朱錠盡獲其海舟 三月鄧愈李文忠胡大海率兵由徽州昱嶺關進攻建德路道出遂安遇長鎗元帥俞子貞擊敗之追至清安遂安守將洪某率眾五千來援大海復戰敗之軍抵建德元參政不花等不支棄城遁丙申克建德路以文忠爲帳前總制親兵指揮使守之文忠太祖姊子也時建德新破城中守禦未備張士誠遣其徒率苗獠水陸奄至城下文忠出奇兵大敗之取所斬俘馘載巨筏中乘流而下水

寇見之亦遁 夏六月張士誠兵寇常州湯和力戰
敗之擒其卒三百人士誠復寇常熟廖永安與戰於
福山港大破之追至通州狼山獲其戰艦而還 九
月元苗帥左丞楊完者爲張士誠所殺先是江淮旣
亂元兵屢敗議者以爲苗兵可用遂自湖廣招至累
破張士誠兵歷陞至左丞然苗性貪殘好殺所過抄
掠屠戮無遺郡縣苦之士誠爲所窘旣降欲圖之而
達識帖睦迤亦厭完者驕橫不可制乃陰定計用士
誠兵圍之完者兵敗自殺丁酉其部將員成蔣英劉
震等率所部詣李文忠降完者死士誠益無所憚尋

遣兵據杭州嘉興達識無如之何矣 冬十月張士誠兵寇常州湯和等擊敗之俘甲士千餘人舟千艘馬千匹甲戌克宜興徐達邵榮帥師攻宜興久不下太祖遣使謂曰宜興城小而堅未易猝拔聞其城西通太湖張士誠餉道所由若斷其餉道軍食內乏破之必矣達乃遣丁德興分兵絕太湖口而併力急攻城遂破旣拔宜興廖永安復帥舟師擊士誠兵於太湖乘勝深入遇呂珍與戰不利遂爲所獲不屈士誠囚之太祖欲以所獲將士三千人易永安士誠不從士誠母念士德欲以永安易士德太祖亦不許士德

尋謀間殺之楊國興出太湖口與諸將趨湖州攻舊館破張士信兵又平宜堰口三十六寨太祖命國興總督元帥沈仁等守之國興勞徠安集民多歸之遂城宜興三月城完士誠水陸來寇國興率諸將擊敗之士誠遁去

十九年春正月庚申胡大海李文忠取諸暨州張士誠將華元帥遁去已而士誠遣呂珍率兵圍諸暨堰水灌城大海援之奪堰水灌珍軍珍窮蹙卽馬上折矢誓求解兵去大海然之都事王愷諫曰賊狡猾難信不如擊之大海曰彼果來吾有以待之且言出而

背之不信既縱而擊之不武遂縱之去 二月張士誠兵寇江陰艨艟蔽江僞將蘇同僉者建牙君山指畫爲進攻狀守將吳良下令曰彼眾我寡當以計破之勿輕動有頃敵陣於江壩良命弟禎整兵北門當其西北面以十餘騎蹂之擒其卒數人餘黨莫敢前賊分兵欲攻東門良遣元帥王子明馳擊之擒其將士五百人殺溺死者甚眾敵大敗宵遁時賊屢侵常州良及其弟禎守禦有方每寇至輒破走之士誠數敗氣索自是不敢犯境太祖召入見勞之曰吳院判保障一方使吾無東顧憂其功大矣賜車馬珠玉不

足旌命諸儒臣爲詩文美之先是士誠北有淮海南
據浙西長興江陰皆其要害長興據太湖口陸走廣
德諸郡江陰枕大江扼姑蘇通州濟渡之處得長興
則士誠步騎不敢出廣德窺宣歙得江陰則士誠舟
師不敢溯大江上金焦自是侵軼路絕 平章邵榮
自臨安進攻湖州戰不利還屯臨安李伯昇來攻設
伏山下戒寇至勿動俟山上旗舉齊擊之伯昇果率
眾奄至遇覆敗王師乃還 三月張士誠寇建德李
文忠禦之於東門使別將潛出小北門間道過鮑婆
嶺由碧鷄塢繞出陣後大破之士誠復遣兵侵嚴州

至大浪灘李文忠令部將何世明率精銳西出烏龍嶺至胥口與戰破走之士誠兵據分水嶺世明進擊斬首五百餘級太祖自將取紹興以馮國用守之國用卒於軍士誠復遣兵陷紹興九月張士誠遣兵寇常州吳復督兵出忠節門奮擊大敗之吳良問道殲其援兵於無錫之三山士誠兵狼狽奪氣乃還十二月張士誠忿分水之敗復遣兵據分水新城之三溪何世明擊之斬其將陸元帥花將軍等一千餘人焚其營自是士誠不敢窺建婺尋改建德爲嚴州府

二十年春三月常遇春攻杭州不克 秋九月張士誠兵侵諸全守將袁寶戰死呂珍徐義自太湖分三路寇長興耿炳文擊破之總管湯全張琪被殺

二十一年秋八月胡大海攻紹興部將張英恃勇輕進至城下遇伏死之大海引兵還 冬十月張士誠遣其將李伯昇寇長興眾十餘萬水陸並進勢甚銳城中守兵僅七千耿炳文禦之諸將陳德華高費聚等三路往援伯昇夜劫營諸將皆潰炳文嬰城固守伯昇悉兵圍之結九寨爲樓車下瞰城中運土石填壕隍以火船燒水關攻益急炳文晝夜應敵內外不